

Da Zara, di sier Francesco Venier, conte, e sier Giacomo da Molin, capetanio, di 19. Come Schender bassà non à zente più dil consueto. *Item*, quella terra non ha 300 homeni da fati; la peste è pur cessada; dimanda danari et munition, qualle li fo za mandate.

Da Liesna, di sier Venier Vituri, sopracomito nostro. Avisa la soa navigatiom, et da la Braza ave 20 homeni, et par se li rupe l'antena navegando, adeo convene ritornar li a Liesna.

Da Capo d' Istria, di sier Piero Querini, podestà et capetanio, di 28. Per uno suo explorator, stato a Beglai, dice nulla esser de' turchi adunanza, e ivi esser stà brusati cinque christiani, per caxon fono quelli feno corer martolossi a' l'horo danni dil conte Michiel.

Da Udene, di sier Antonio Loredam, el cavalier, luogo tenente. Zercha le biave di la Patria, sono stà redute a le forteze; ma li strami, non è possibile vogliu obedir, et, acadendo, li mandarà a brusar.

Fu leto la parte di debitori, di cazarli di pregadi et ofiej, et admoniti tutti pagino, termine zorni 8, e, passadi, sarà mandà la leze a execution. *Item*, fo leto etiam il zorno poi a gran conseio.

Fu posto parte per li consieri, che sier Alvixe da Molin, provedador sora la exation, possi venir im pregadi. Et ave 2 di no. Fu presa.

Et avanti si lezesse le letere, sier Hironimo Lion, el cavalier, avogador di comun, andò in renga; e menò sier Fantin Valaresso, era provedador a Pizegatom, qual era innamorato in una moglie di Zuan da Casal, stava a Pizegatom; qual per esso proveditor fo publicato rebello. Et qui exagerò la cossa, *tamen* non intervene sforzo alcun. Et ditto provedador era stà fato venir in questa terra, et poi messe, insieme con sier Piero Morexini, suo collega, parte di retenirlo. Ave 20 non sincere, 55 di la parte, 68 di no. Et perchè la pendeve, *iterum* ballotata, have 20 non sincere, 48 di la parte, et 73 di no. Et fu preso di no, et fu asolto.

Fu posto, per tutti i savij, parte, atento il bisogno si ha di danari per le cosse maritime, che tutti quelli dil colegio debano venir in termine di zorni tre al conseio con le so opinion. Et fo opinion di nui savij ai ordeni; *tamen* tutti introe. Ave tutto il conseio, *solum* XI di no; sì che la terra è ben disposta di provisioni.

Fu posto per tutti, atento fu preso di dar le refusure a le zurme, andarano con le galie di viazi, sopra il viazo; e perchè si rendino difficile andar, che li sia dato ditte refusure *de præsenti* a tutti quelli

andarano. Ave 4 di no. Et la matina fo ballotà ducati 1000.

Fu posto per tutti dar a' stratioti 35 mothonei provisioni di ducati uno di più, e a li capi *etc.*, come in la parte apar. Ave tutto il conseio.

Fu posto per tutti, dar a Nicolò Dacha, orator di Modon, era qui venuto, e havia ducati 600 de intrada, la cancelaria di Piove o ver di Mestre, per fino vacherà quella di Castel Francho, qual habbi in vita. *Item*, a Zuam Coliva, l'altro orator, la scrivania di Padoa, in loco di Andrea Usnagi, et a Nicolò Sava, terzo orator, la scrivania sora i lidi, le qual provisioni siano cussi per l'horo, come per mantener le soe fameglie. Ave tutto il conseio, *videlicet* 16 di no, 122 di la parte; che fo gran exempio a tutti.

Fu posto per tutti, dar a Nicolò Aurelio, secretario, per haver perso quello havia a Modon, e suo cuxin Francesco Aurelio, era cancelier a Modon, esserli stà trato fuora il cor *etc.*, che l'habi, lasando la cancelaria, l'oficio di le biave, poi harà compito Lion Sanxon. Et sier Alvixe Mudazo, sier Piero Contarini, consieri, e intrò sier Francesco Foscarei, savio a tera ferma, messeno, atento è molti modonei e nostri zenthilomeni vol provision, de indusiar. Et, andate le parte, quella di savij have 28; di l'industria il resto. E fu presa.

Fu posto, per li savij dil conseio e di terra ferma, risponder a la letera dil re di romani, zercha lassar passar *etc.* in optima forma; che lassemo passar tutti, *excepto* li rebeli dil christianissimo re e di la Signoria nostra, et con dolze parole. La qual letera si manderà a soa majestà per uno corier nostro. Ave 6 di no, il resto di sì.

Fu posto per li savij ai ordeni, atento sier Andrea Michiel, provedador in Albania, chome si ha per letere di Antivari, habi dato molte provisioni, che tutte siano revochate, si non sarà confirmate per questo conseio. Et, atento sier Antonio Bon vadi provedador in Albania, che zonto el sarà de li, ditto sier Andrea Michiel vengi via. Have tutto il conseio.

Di Cervia, di sier Vetur Dolfim, podestà, di primo. Come era venuti alcuni, per nome dil signor di Rimano, nominando uno conte Cesaro di Picenini, dimandando, atento Valentinoys veniva a tuor quella cità, e il signor volea mandar li alcuni animali et robe, pregando li fosse dà letere di passo; e lui podestà rispose, scriveria a la Signoria nostra. Per l'altra letera avisa le sarazinesche di la terra saria bon conzarle con pocha spesa. *Item*, chome, a di ultimo, passò il prefeto de li, dove alozò una note